



DEO OPTIMO MAX.
UNI ET TRINO.

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA.

QUODLIBETARIIS DISPUTATIONIBUS
manè discutienda, in Scholis Medicorum, die Jovis vigesima nona
Januarii M. DCC. XXXIX.

M. MICHAELE-PHILIPPO BOUYART,
Doctore Medico, Præsides.

An ossa innominata, in gravidis & parturientibus, diducantur?

I.



UI varias ossium juncturas contemplabitur, is mirari nunquam desinet, tam variè, tam appositè atque utiliter uniuntur. Alia in serræ modum dissecta, dentibus quandoque in hirundinis caudam formatis, vicissim excipiuntur atque excipiuntur. Hinc fit ut & satis firmitatis habeant, & præcaveatur, ne, si quando fracta fuerint, scissuræ ultra juncturas productæ ad vicina ossa proserpant. Alia foveis eminentiisque cartilagine obductis, sibi mutuò respondentibus.

A

bus, sæpè, non sinè motu aliquali, coëunt: alia alveolis profundioribus, clavorum instar, fixa permanent. Hæc laxioribus ligamentorum vinculis nexa in partem omnem flecti, illa longiusculis flexilibusque cartilaginibus ligata, certis tantùm limitibus, moveri videas; quædam, cartilaginum brevissimarum ope, ita glutinari, ut, semper aliàs immota, definitis tamen temporibus & circumstantiis, possint, si non omninò separari, saltem insigniter ab invicem recedere, videlicet in gravidis, ubi plenius pabulum accipiunt ossibus *innominatis* adnatæ cartilagine, & eorumdem ossium ambitus interior insolito pondere diu comprimitur, necnon in parturientibus, dum moli crassissimæ violentum præbent exitum.

I I.

EORUM rudimenta exilissimis primùm membranarum filamentis constare, in tenerimis animantium *embryonibus*, deprehendes. Mox, perenni succi ad concrescendum apti appositione, solidiorem contextum dictæ membranæ, deinde cartilaginis, tandem ossis duritiem consequuntur. Quam tamen, non omnia statim ossa, nec ubique, sed partitis vicibus, & servato indurationis ordine, sic acquirunt, ut statim mediæ pars, postremò extrema indurentur. Plurimæ tamen (maximè puerorum ossibus) interpositæ manent cartilagine, quarum non pauca obliterantur in adultis, reliquæ suam indolem retinent, nec, nisi provectissimâ ætate, in ossa abeunt. Has porro cartilagineas juncturas non sivit obliterari prudens rerum opifex, ne, quæ ossa debent aliquando ab invicem diduci, strictiore nexu cohæreant. Est autem ubi (quod superius innuimus) illæ cartilagine solito plus nutriantur atque intumescant. Hinc amplius ab ipsis spatium occupari necessum est, atque ossa sensim dimoveri. Quæ res non magis mira videatur, quàm pondera maximâ, substratis velicis, aëre paulatim intromisso, levare, saxeosque non spernendæ magnitudinis *cylindros*, inductis ex ligno arido, postea madefacto, cuneis, in tabulas planè divelli. Quæ exempla si cui fortè, argumento nostro, disparia videantur, is ad prodigiosos *Polyporum*, in ossa faciei, effectus attendat. Molle quidem & ferè pulposum tumoris genus, palati, narium, maxillæ ossa, quàmvis granulata, proindeque robustâ articulatione conjuncta, paulatim crescendo, sic à sede suâ dejicit, ut (visu horrendum) reterrimè facies deturpetur. Tantò magis igitur, quàm *Polypi*, in dimovendis ossibus poterunt, plenius enutritæ cartilagine, quantò ipsos *Polypos* duritiæ & resistentiæ superant. Quid si moles aliqua, hujus generis tumoribus longè ponderosior, ossium ambitui interiori incumbat, cui in dies semper aliquid incrementi accedat? Nisi cartilaginum certè obsecundabitur. Amplius demum atque amplius laxabitur compages, dum moles illa ampliore ipsius ostio nata, per aliud longè arctius, non sinè maximâ vi, extorquebitur.

I I I.

HUC referre ne dubites ossa fœminarum *innominata* quæ, quàmvis eadem ferè ac virorum, notis tamen singularibus & propriis differunt. Quatuor præcipuis ossibus, in utroque sexu, constant. Eorum

compagem, propter similitudinem formæ, pelvim nuncuparunt anatomici. Partem posteriorem claudunt os sacrum, anteriorem ossa pubis, laterales ilii, imam & posteriorem *ischii*. Sacrum anticè leve, nonnihil incurvum, posticè convexum, scabrum, lumborum vertebra semisem superius refert, corpore, foveis duabus cartilagineis, foramine magno insignem. In angulos duos statim exspatiatur, quorum latera paulatim ad te accedentia in tertium desinunt truncum atque imperfectum. Laterum, si partem inferiorem excipias, scabra, inæqualis, utrimque tamen *symmetrica* superficies, quâ, cartilaginis ope, cum iliorum ossibus jungitur. In facie internâ lineæ quatuor transversæ, ossis, totidem olim cartilaginibus divisi, indicia. Foramina utrimque quatuor, rariùs quinque apparent. Postica pars æquali foraminum numero, sed & canale ab ossis basè orto, versus apicem deficiente, pervia est; cujus canalis dorsum eminentiis munitur *apophyses spinosas* mentientibus. Truncati apicis angulum perficit *coccygæ*, tribus, ratò pluribus, ossibus conflatum, antrosum inflexis, datâ occasione, cartilaginum quibus nectuntur operâ, reflecti non nesciis. Iliorum ossa utrimque duo, quorum partes duæ, superior altera, altera inferior. Superior quasi in concham expanditur, cujus facies interior levis & concava quoad anticam partem, quoad posticam verò, ita elata aut depressa ut cum lateribus ossis sacri conveniat. Exterior anticè convexa, posticè versus os sacrum concava. Totius ossis limbi quatuor; superior maximus, arcuatus, tribus lineis distinctus, mediâ nempe unâ, quæ crista dicitur, lateralibus duabus, quæ labia audiunt. Hic arcus in tuberculum posticè desinit, quod spina posterior-superior, anticè in eminentiam graciliorem, quæ spina anterior-superior nuncupatur. Posterior limbus scissurâ amplissimâ sinuatus, à spinâ posteriore-superiore ducto initio, in *ischii* spinam desinit. Marginis anterioris initium est spina anterior-superior, cui minor altera subjicitur, scissurâ quâdam interjectâ. Reliqua ossis pars, facie externâ-anticâ, supercilio arcuato eminet, ac deinde in partem acetabuli superiorem excavatur. Ibi quartus limbus desinit in angulum, cujus latus posterius cum *ischio*, antè cum osse pubis unitur. In hoc duo præcipuè spectanda, ramus & margines. Ex margine superiore oritur linea elata, quæ, per mediam-internam ossis ilii partem continuatâ, ad os usque sacrum extenditur, pelvimque in duas partes dividit, superiorem unam latissimam, inferiorem alteram arctiorem. Margine inferiore clauditur pars foraminis ovalis superior, exteriorè perficitur portio acetabuli antica. Per internum autem marginem, os pubis, intermediâ cartilagine, satis crassâ, cum pari articulatur. Hinc sumptâ origine, ramus versùs exteriora & posteriora deflectit, dein cum opposito osse factò angulo, *ischio* conjungitur. *Ischii* verò pars superior-posterior spinâ longâ, lactâ, acutâ spectabilis, posticè cum osse ilii, anticè cum osse pubis unita portionem acetabuli inferiorem complet, deinde versùs anteriora declinando desinit in tuber satis crassum, tendonum vestigiis asperum, atque (*apophyse* brevi emissâ) cum parte rami inferiore ita copulatur, ut inter utrumque supersit foramen ovale à formæ similitudine nominatum. Præter eas quas exposuimus carti-

lagines, hæc ossa firmantur insuper ligamentis, quorum præcipua & robustissima duo sunt, alterum ab *ischii* spinâ, alterum ab ejusdem tubere orta, in partem ossis sacri posteriorem - inferiorem ferè coeunt. Omnia in fœminis leviora sunt quam in viris, aliquantulum ampliora, graciliora tamen, mihiùs ponderosa, contextûs laxioris. Portiones iliorum superiores magis compianata, latiores, magis ab invicem distat. Sed insignioribus notis differunt ossa pubis, majore nempe brevitate, & crassitie cartilaginis, quæ seriùs in fœminis obliteratur atque in os facessit, rami verò multò graciliores obliquiùs ad latera divergunt, undè rictu ampliore dehiscit angulus. Quòd sensibiliùs etiam patet in multoties enixis. Neque profectò silentio dignum est quòd, in ipsis, prædictorum ramorum limbi interni extorsum inversi apparent, quasi tales sui notas vi extrusus infans impressisset. At non tantùm singularia hæc habent ossa fœminarum *immominata*: utero enim dum gestat, interior ipsorum superficies, veluti cuneo comprimitur, omnes cartilagines plenius nutritæ capiunt incrementum, nec sine maximo molimine, fœtus jam maturus excluditur.

IV.

QUAE ut plenius innotescant situm uteri in virginibus, augmentumque in gravidis perpende. Locum vesicam inter & Rectum ita nactus est, ut, si cum appensa vaginâ consideretur, ad posteriora nonnihil inclinet. Hæc versus anteriora descendens, sub angulo ossium pubis, in partes genitales externas desinit. Tamdiu verò sua utero forma moleseque restat, quàmdiu virginitate fruitur fœmina. At ubi concepit fœcundatumque ovum in uterum receptum est, tenuia *embryonis* rudimenta, sensim, appellente succo nutritio, explicantur atque auferunt, donec post 1x menses in fœtum grandiore creverit. Nec penè prodigiosum tantulæ molis incrementum potest accedere, quin etiam augeantur partes proximæ. Sanguinis nempe materni, ad fœtum perpetuò copiosiusque quàm par est, allabentis, pars superflua, in laterales arteriarum ramos hinc atque hinc divertit, unde plenior circa viciniam nutritio. Exemplo sit uterus ipse cujus moles & pondus sunt, in mox parituris, fortè centuplo majora, quàm in virginibus. Pari jure singulas partes vicinas, pro contextûs sui conditione, certum est plus minùsve crescere. Hinc tanta gravidis, sed maxime (circa graviditatis finem) clunium iliorumque amplitudo. Hinc etiam cartilaginum pelvis, atque illius maxime quâ pubis ossa junguntur, solito majus incrementum. Nunc verò, si fœtus maturi molem cum pelvis ambitu interiore (ut ut in fœminis ampliore quàm in viris) conferas, nunquam ipsi sufficientem exitum patere reperies. Quam rem eò magis mirabere, quò transitum illum, plurimis insuper partibus, impeditum & coarctatum advertes. His porro impedimentis annuera musculorum *iliacorum* & *psaos* tendones, obturatores internos, vesicam, rectum, portionem *peritonei cellulosa*m, vaginam denique ipsam. Neque his non addi debere crediderimus manuum obstetricantem quæ nonnunquam intrusa in præterum, juxta fœtum ipsum, pro eo excludendo, maximo conatu redu-

ciunt. Qua igitur ope tam arctum, totque difficultatibus circumseptum iter à foru exituriente superari potest?

V.

LA XATA nimirum (ut fieri solet) ossium *innominatorum* compage. Cujus rei ratio ut pateat, non tantum uteri gravidi, pelvim prementis, pondus molemque, sed modum etiam quo premit considera. Cum appensa vaginâ uterus, in hoc casu, cunei instar est, pro cuius basi uteri fundum habeas, pro medio, collum, pro apice, vaginam. Cuneum autem hunc non ita malè quadrare comperies cum ossibus pelvis quorum superiorem alveum, lineâ elatâ distinctum spatiosum, inferiorem verò arctiorem esse exhibuimus. Hinc tum suâ, tum viscerum abdominis super incumbentium gravitate, tum etiam *diaphragmatis* pressione, pondus prædictum in ossa *innominata* sic agit, ut paulatim possint deduci. Huic verò pressioni quodnam momentum additum iri putas, si mulier gravida stando, ambulando, saltando, corpus denique multifariam movendo, crebrò exerceatur? Maximum sanè. Sic enim foru distensus uterus identidem succutitur; hinc vis percussiones oritur gravitatis viribus longè superior. At tantine erunt, inquires, leves uteri luccussiones, ut firmissimis vinculis stabilitam compagem labefactent? Ita sanè, cum præsertim, toto graviditatis tempore, sæpius atque sæpius læterentur. Hinc liquet, cur mulieribus quæ gravidæ crebrò exercentur partus sit facilis, iis verò quæ otiosæ fuerunt, difficillimus. Audità nunc prementis uteri, in pelvis ossa, actione, supradictam cartilaginum intumescantiam in animum revoca, & comperies mutuum sibi auxilium ab utrâque causâ præstari. Dum enim pendet uterus, paulatim dimoveantur ossa, trahuntur & extenduntur cartilagines in latum, hæ verò, dum crescendo intumescunt, pressioni ab utero factæ, ac proinde ipsius descensui, favent. Nec desunt quamplurima experientiæ argumenta, quibus hæc nostræ de ossium diductione sententia firmetur. Ossium pubis cartilago in mulieribus mollior est quàm in viris, in gravidis autem, præsertim instante partu, tum solito crassior, tum unctuofo humore imbuta. Quod utrumque in binis fœminis quadrimestrem alterâ, alterâ septimestrem fœtum gerentibus, non ita pridem, observatum est. Sed in hac præsertim digitum unum crassa cartilago scalpello facillè se præbuit separabilem, nec multò difficiliùs, sine ferro, sed levi manus auxilio, alterum os illi ab osse sacro planè divulsum est. His adde quod quæ adolescentæ ætate concipiunt, facillimè, quæ verò provecità, difficillimè factum excludant. Quæ enim in his cartilagines exsiccata ac propè in os mutata cedere nesciunt, in illis succo turgidula & molles obsequentiores se præbent. Neque profectò est quòd opponas utriusque musculi obliqui externi fibras in os pubis lateris oppositi insigi, quâ fibrarum *tendinearum* dispositione ossium diductioni obstat. Obex quidem est: sed levissimus. Quid enim adversum pressionem ab utero factam, cartilaginumque intumescantiam possunt tenues fibrarum fasciculi? Inceptam nunc, per graviditatem, ut probavimus, pelvis dilatationem, ulteriùs, inter pa-

riendum, promoveri frustra contenderes, cum, præter allatas rationes, ipsam experientiam proferendam habeamus. Quò sæpius peperit foemina, eò ampliore rictu patet, cum tota pelvis, tum ipse ostium pubis angulus. Imò in recenter enixis (ne de reflexione coccygis quæ a nemine prorsus negatur, verba faciam) alterum os pubis, si digito comprimitur, alterum supereminet. Quare silentio non involvenda quæ memorat Riolanus. *Sæpe sæpius*, inquit, *in mulieribus mox à partu extinctis, vel paulò antè enixam, vidi præsentibus medicis & chirurgis, cartilaginem quæ ossa pubis colligat minimi digiti latitudine diductam, ita ut hinc ossa ap- parerent, si digito intus attraheremur.* * Talibus verò rationibus observationibusque fultis quidni concluderemus?

Ergò ossa innominata, in gravidis & parturientibus, diducuntur.

* Hoc vel ratiociniis vel observationibus probant Jac. Carpus Comment. in Munderinum, Alexand. Benedictus in Anat. Sylvius Isagoge in Anat. Spigelius, Paræus, Harvey, Isbrandus Diemerbroeck, Daniel Ludovici, plurimique alii auctores gravissimi.

DOMINI DOCTORES DISPUTATURE.

M. Jacobus-Albertus Hazon.	M. Ludovicus - Florentius Bellor, Chirurgiæ Professor.	M. Petrus-Joannes Buretti, Professor Regius, & Regiæ Numismatum Academiæ.
M. Claudius-Carolus de Jean.	M. Joannes de Dieft.	M. Petrus Mayais.
M. Franciscus-Felicitas Cobus.	M. Josephus de Jussieu.	M. Urbanus Leaulié.

Proponerebat Parisiis, EXUPERIUS-JOSEPHUS BERTIN^{us},
Rhodonensis, Baccalaureus Medicus, A. R. S. H.
1739. à sextâ ad meridiem.